

## Kap. 3

### Vedtekter for lokale organisasjonsledd

#### Vedtekter for fylkeslag

##### § 26 Oppretting

I kvart fylke skal det vere eit fylkeslag av Skolenes landsforbund.

##### § 27 Oppgåver

1. Fylkeslaget skal arbeide etter dei retningslinjer som går fram av vedtektene og programma for Skolenes landsforbund og Landsorganisasjonen i Noreg.
2. Fylkeslaget har det overordna ansvaret for å ivareta medlemmene sine interesser. Fylkeslaget skal sjå til at naudsynte hovudtillitsvalte vert valte og meldte til arbeidsgjevar innan kvart avtaleområde.
3. Fylkeslaget skal sjå til at det vert gjennomført lokale forhandlingar for medlemmer på kommunalt, statleg og andre tariffområde, og at det vert valt forhandlingsutval for fylkeskommunen og for kommunane i fylket og eventuelle andre tariffområde, dersom dette ikkje vert ivareteke av foreininga.
4. Fylkeslaget skal ivareta oppgåvene til foreiningane (jf. § 34.3) i fylket/delar av fylket der det ikkje finst foreining(ar).
5. Fylkeslaget kan opprette fagseksjonar og arbeidsutval.
6. Fylkeslaget har ansvaret for å drive opplæring og skolering av medlemmer, i tillegg til informasjon og vervearbeid.
7. I samsvar med retningslinjer trekte opp av Skolenes landsforbund og LO samarbeider fylkeslaga med andre organisasjonar. Fylkeslaget skal arbeide for å styrke solidariteten og samarbeidet mellom forbund og organisasjonsledd i LO.

##### § 28 Kontingent og økonomi

1. Fordelinga av den tilbakeførte kontingenten til fylkeslaget og foreiningane frå forbundet (sjå § 12 A punkt 1) vert bestemt av fylkeslaget sitt representantskapsmøte.
2. Representantskapsmøte i fylkeslaget kan i særskilte tilfelle skrive ut ekstrakontingent. Slikt vedtak må godkjennast av forbundsstyret.

##### § 29 Representantskapsmøtet

1. Representantskapet vert kalla inn så ofte det er naudsynt, men minst ein gong kvart år. Representantskapet skal handsame årsmelding(ar), rekneskap, budsjett, handlingsplan, innkomne forslag og val årleg eller annakvart år innan utgangen av mai månad. Representantskapet vert kalla inn 4 veker på førehand samtidig som melding om tidspunkt og utkast til førebels saksliste vert sendt foreiningane. Foreiningane, klubbane og medlemmene har rett til å setje fram forslag til dette representantskapsmøtet. Forslaga må vere komne inn til fylkesstyret seinast 2 veker før representantskapsmøtet. Sakspapir skal vere sendt ut til foreiningane og medlemmene før representantskapsmøtet. Foreiningane/klubbane skal velje representantar til representantskapsmøtet i samsvar med ei representasjonsordning fastsett av fylkesstyret.
2. Leiar, nestleiar, kasserar og sekretær skal veljast ved særskilte val. Det skal veljast to revisorar og valkomité.
3. Det skal orienterast om årsmelding og rekneskap i foreiningane.
4. Det skal veljast representant(ar) til forbundet sitt landsmøte.
5. Det skal sendast inn godkjente årsmeldingar, rekneskap og meldingar om val for foreiningar og fylkeslaget til forbundet.

##### § 30 Ekstraordinært representantskapsmøte

Det vert kalla inn til ekstraordinært representantskapsmøte, dersom minst 1/4 av medlemmene eller eit fleirtal av foreiningane/ klubbane krev det eller etter krav frå fylkesstyret eller forbundsstyret. Ekstraordinært representantskapsmøte skal kallast inn med minst to vekers varsel og kan berre drøfte dei saker som er sett opp i møteinnkallinga.

### **§ 31 Fylkesstyret**

1. Styret har minst 5 medlemmer og minst 2 varamedlemmer. Fylkeslaget sin landsstyrerepresentant tiltrer fylkesstyret i heile landsmøteperioden. Ein av medlemmene skal vere studieleiar.
2. Styret er vedtaksført når minst halvparten av medlemmene er til stades. Ved likt røystetal avgjer leiaren si dobbeltrøyst.
3. Fylkesstyret har ansvaret for å førebu og kalle inn til representantskapsmøte.
4. Fylkesstyret er fylkeslaget sitt høgaste organ mellom representantskapsmøta og leier arbeidet i samsvar med dei vedtekter og program som gjeld for forbundet og § 27 i vedtektene for fylkeslag, i tillegg til dei retningslinjer som vert trekte opp av representantskapsmøtet.
5. Fylkesstyret skal halde kontakt med foreiningane/klubbane, dei tillitsvalte og direkte tilslutta medlemmer.
6. Gjennom studieleiaren skal fylkesstyret, i samarbeid med LO Stat og LO Kommune, andre forbund og organisasjonsledd i LO, få i gang studiearbeide og sørge for at tillitsvalte får den opplæringa dei treng.
7. Forbundsstyret har til alle tider rett og plikt til å gjennomgå rekneskapa i fylkeslaget. Forbundsstyret kan vidare krevje at rekneskapa vert gjennomgatte av LO sin tilsynsrevisor etter samråd med LO sitt revisjonskontor.

### **§ 32 Oppløysing av fylkeslag**

1. Fylkeslag kan ikkje oppløysast utan godkjenning frå forbundsstyret.
2. Om fylkeslaget vert oppløyst går aktiva til forbundskassa.

### **Vedtekter for foreiningar**

#### **§ 33 Oppretting**

På arbeidsplassar eller i avgrensa område kan det etter søknad til forbundsstyret opprettast foreining. Søknaden vert sendt om fylkesstyret som vidare sender han til forbundsstyret med sine merknader. Fylkesstyret kan også søkje om oppretting av ny foreining for ei medlemsgruppe.

#### **§ 34 Oppgåver**

1. Foreiningane skal arbeide etter dei retningslinjene som går fram av vedtektene og programma for Skolenes landsforbund og Landsorganisasjonen i Noreg.
2. Foreininga skal søkje å organisere alle lønnstakarar som kjem inn under foreininga sitt organisasjonsområde.
3. Foreininga skal ivareta medlemmene sine interesser overfor kommunale styresmakter, blant anna ved å sørge for at det vert valt kommunetillitsvalte etter gjeldande avtaleverk. Foreininga skal sørge for at det vert valt forhandlingsutval og gjennomført lokale forhandlingar for medlemmer på kommunalt og statleg tariffområde, eventuelt andre tariffområde innanfor foreininga sitt organisasjonsområde. Ved behov vert forhandlingsutval som er nedsett på fylkesnivå, nytta.
4. Foreininga skal halde jamleg kontakt med enkeltmedlemmer.
6. Foreininga skal i samarbeid med fylkeslaget ha ansvar for opplæring og skoling av medlemmer, i tillegg til informasjon og vervearbeid.
7. Foreininga skal slutte seg til den lokale LO-avdelinga på staden.

#### **§ 35 Kontingent og økonomi**

Årsmøte i foreininga kan i særskilte tilfelle skrive ut ekstrakontingent. Slikt vedtak må godkjennast av forbundsstyret.

#### **§ 36 Årsmøte**

1. Ordinært årsmøte bør haldast før representantskapsmøtet i fylkeslaget, og seinast innan utgangen av april. Årsmøtet skal kallast inn minst tre veker før det vert halde, saman med utkast til førebels saksliste. Klubbar og medlemmer har rett til å setje fram forslag til årsmøtet. Forslaga må vere komne inn til foreiningsstyret seinast ei veke før årsmøtet. Årsmøtet skal halde val og handsame årsmelding og rekneskap. Godkjent årsmelding og rekneskap skal sendast fylkeslaget.
2. Val av styre vert gjort på årsmøtet. Leiar og kasserar skal veljast ved særskilte val. Det skal veljast 2 revisorar og valkomité.
3. Foreiningar som har behov for det, kan organiserast med representantskap. §§ 28 nr. 2, 29 nr. 1 og

2 og 30 gjeld då tilsvarande som for fylkeslag.

### **§ 37 Ekstraordinært årsmøte**

1. Ekstraordinært årsmøte skal kallast inn når styret eller minst 1/4 av medlemmene krev det. Forbundsstyret kan også krevje at det vert kalla inn til ekstraordinært årsmøte.
2. Det ekstraordinære årsmøtet kan berre handsame dei saker som har vore grunn til innkallinga. Slikt årsmøte kan kallast inn med ei veker varsel.

### **§ 38 Medlemsmøte**

1. Medlemsmøte skal haldast så ofte styret gjer vedtak om det. Saksliste vert bestemt av styret og skal kunngjerast på førehand. Forslag som er komne inn frå medlemmer i samsvar med punkt 2 i denne paragrafen, skal førast opp på sakslista.
2. Medlemmer som ønskjer saker tekne opp i medlemsmøte, skal melde det til styret.

### **§ 39 Foreiningsstyret**

Styret i foreininga skal bestå av minst tre medlemmer og minst eitt varamedlem.

1. Om det vert valt studieleiar, skal denne vere medlem av styret.
2. Styret er vedtaksført når minst halvparten av medlemmene er til stades. Er det likt røystetal avgjer leiaren si dobbeltrøyst.

### **§ 40 Oppløysing av foreining**

1. Foreininga kan ikkje oppløysast utan godkjenning frå forbundsstyret.
2. Om foreiningar vert oppløyste, går alltid aktiva i foreininga til fylkeslaget si kasse.

## **Vedtekter for klubbar**

### **§ 41 Oppretting av klubb**

På arbeidsplassar med fleire medlemmer skal det som hovudregel opprettast klubb. Der det ikkje er praktisk mogleg å opprette klubb, må det avtalast mellom SL sine medlemmer kven som skal representere SL på arbeidsplassen.

### **§ 42 Oppgåver**

1. Klubben skal arbeide etter dei retningslinjer som går fram av vedtektene og programma for Skolenes landsforbund og Landsorganisasjonen i Noreg.
2. Klubben skal arbeide for å organisere alle lønnstakarar som kjem inn under organisasjonsområdet til klubben.
3. Klubben skal ta vare på medlemmene og forbundet sine interesser på arbeidsplassen i forhold til dei styrande utvala og drøftande organa i driftseininga.
4. Klubben skal ta initiativ til opplæring og skoloring av medlemmer overfor foreining/fylkeslag.
5. Klubben skal ha ansvar for informasjon til medlemmer, og for lokalt vervearbeid.
6. Klubben skal utføre andre oppgåver gjevne av foreininga/fylkeslaget eller forbundet.

### **§ 43 Økonomi**

Klubben får dei økonomiske midlane sine gjennom søknad til/vedtak i foreininga/fylkeslaget han er tilslutta.

### **§ 44 Årsmøte**

Ordinært årsmøte bør haldast innan utgangen av mars. Årsmøte skal kallast inn med minst ei veker varsel saman med utkast til førebels saksliste. Medlemmer har rett å setje fram forslag til årsmøtet. Forslaga til årsmøtet må vere komne inn til klubbstyret seinast tre dagar før årsmøtet. På årsmøtet skal det haldast val og handsamast årsmelding, rekneskap og innkomne forslag. Melding om val skal sendast foreining, fylkeslag og arbeidsgjevar innan åtte dagar.

### **§ 45 Ekstraordinært årsmøte**

1. Ekstraordinært årsmøte vert kalla inn når styret eller minst 1/4 av medlemmene krev det. Foreiningsstyret kan også krevje at det vert kalla inn til ekstraordinært årsmøte.
2. Det ekstraordinære årsmøtet kan berre handsame dei sakene som har vore grunn til innkallinga.

Slikt årsmøte kan innkallast med to dagars varsel.

### **§ 46 Medlemsmøte**

1. Medlemsmøte skal haldast så ofte styret gjer vedtak om det, likevel minst ein gong kvart kvartal. Sakliste vert bestemt av styret og skal kunngjerast på førehand.
2. Medlemmer som ønskjer saker tekne opp i medlemsmøtet bør sende forslag om det til styret.

### **§ 47 Klubbstyret**

1. Klubben skal ha eit styre.
2. Styret er vedtaksført når minst halvparten av styremedlemmene er til stades. Ved likt røystetal, har leiaren dobbeltrøyst.

### **§ 48 Oppløysing**

1. Ein klubb vert oppløyst når medlemsgrunnlaget ikkje lenger er til stades. Den siste leiaren sender melding til foreining/fylkeslag. I dette tilfelle trer § 41 i kraft.
2. Om klubben vert oppløyst, går alltid aktiva i klubben til foreiningskassa, eventuelt fylkeslagskassa.